



UKA 2015/82  
5. november 2015  
Hans Aronsen

**Nunatsinni sulisoqarniarnikkut sulisussarsiortarnermi aammalu sulisunik atatitsiinnarnissamut Naalakkersuisut qulaajaanermik suliaqartitsinissaannik Inatsisartut aalajangiiffigisassaattut siunnersuut. Qulaajaalluni suliap pingaartumik sammissavai inuiaqatigiittut ingerlatsinermi pingaarutillit suliffeqarfiit, soorlu peqqinnissaqarfik, atuarfeqarfiit inunnik isumaginnittoqarfiit il.il. aamma ilanngullugu saqqummiunneqassapput suut suliniutit ingerlanneqarnersut innuttaasut suliffeqarnermut attaveqarnermikkut annaasaqarnissamut aarlerinaatillit pillugit. Qulaajaalluni suliaqarneq kingusinnerpaamik naammassineqarsimalluni Inatsisartunut saqqummiunneqassaaq Inatsisartut 2016-mi ukiakkut ataatsimiinneranni.**

(Inatsisartunut ilaasortat, Steen Lynge aamma Siverth K Heilmann)

Inuit Ataqatigiinniik siunnersuummik saqqummiussisunut Steen Lynge aamma Siverth K. Heilmann suliarnut tikilluaqqullugit peqatiginiarpagut, politikikkummi pingaartitagut matumani pineqarmata.

Nunarput namminersulivissimassaaq sulisoqarnikkut isumannaatsumik illersuisinnaassuseqartoq, sulisinnaasullu nunatsinni najungallit ineriartornermut akisussaaqataallutik peqataasut nukittoqutaasullu.

Naalakkersuisunut suliakkiummut peqqissaartumik sulisoqarnissaa pingaartupilussuuvuq, inuiaqatigiinnummi sullissinerit ingerlanneqartut pingaaruteqarluinnartullu ullumikkornit suli pitsaanerunissaat siunnersuummi pineqarmata.

Nunatsinni inuttoorsuunngitsumi siamasissumik najungaqariuseqarnerput nunarujussuarmi najugaqarnitsinni angisuumik nukittoqqutigaarput, illuatungaatigullu innuttaasunik sullissinermi arlalitsigut sanngiilliorfigisaripput siunnersuutip takuteqqippaa.

Misissuinermi peqataaffigisatsinni sulisitsinermi sulisoqarnermilu

Inoqarfiit ilaanni atuarfinni, peqqinnissaqarfinni allanilu suliffinni sullissisinnaasunik amingaa-teqartuarterput, tamanna assigiinngitsunik tunngaveqartoq ullumikkut ilisimaarivarput. Soorlu nunaqarfinni suleqateqannginneq tunngavingalugu, ullormut misigisanik allannilluunniit suliarnut tunngasunik avitseqateqatissaaleqineq piusarmat.

Inoqarfiit ilaanni inukitsuni sulisussarsiortarneq ajornaatsuinnaanngilaq, pingaartumik inukkilliartortuni, inuiaallu ataasiugatta inoqarfinni tamani sulisussarsiortarnermut pitsaaqutit ajoqutillu misissoqqissaarneqartariaqarput, sanngeequtaasullu qulaajarneqartariaqarlutik.

Namminersorlutik Oqartussaqaarfitta iluani sulisussarsiortarnermi soq nunatsinninngaaneersut atorneqarpallaannginnerujussui tunngavia tikillugu misissorneqartariaqarput. Suliffimmilu qaassarluni pikkorissartarnerit siunissami inuiaqatigiinnut nukittoqutaallutik iluaqutigineqanngitsut annertusangassaammata ilanngullugu sukumiisumik misissorneqartariaqarpoq.

Sulisunik atatitsiinnarnissap misissornerani pisortani suliffeqarfiutitsinni tamani atatitsiinnarnissamut qanoq suleriuseqartoqarnera sukumiisumik ingerlanneqartariaqarpoq. Tunisassiorfiit uneqattaartumik suliffiunerisa kingunerisartagaat, sipaarniarnerit pissutingalugit sulisukillisaasarnarit qanoq sulisunut sunniuteqartarneri tamakkuupput misissorneqarnissaannut Inuit Ataqatigiinniik soqutigisatta ilaat.

Inuit Ataqatigiinniik siunnersuut taperserlugu Inuussutissarsiornermut ataatsimiitaliamut suliassanngortipparput, tassani suleqatigiilluta suliakkiissut naammassineqarnissaa qulakkeerneqaqqullugu.